

每週經課朗誦經文(巴克禮台語漢字)2013/05/09

共同經課 - 1 使徒行傳一章一節~十一節

1 提阿非羅啊，我已經將耶穌對起頭所行所教示的，2 直到伊託仗聖神命令所揀的使徒了後，受接接上天的日，逐項記載佇前的冊。3 伊受害了後，曾用多多憑據，佇四十日的中間，出現互使徒看見，來顯明伊家己是活，續講論上帝國的事。4 伊及in聚集的時，命令in，講：「毋通離開耶路撒冷，著聽候父所應允的，就是恁曾對我聽見的。5 因為約翰用水行洗禮，獨獨恁閣無幾日，欲佇聖神受洗。」6 按呢in聚集的時，問伊講：「主啊，你佇此時欲將國復倒互以色列嗎？」7 伊就給in講：「父所下佇伊家己權內的時及期，毋是恁所通知。8 獨獨聖神臨到恁的時，恁欲得著才能，閣佇耶路撒冷、遍猶太，及撒瑪利亞，直到地極，欲做我的干證。」9 諸個話講了，in啲看的時，耶穌受舉起上天，有雲接接伊，in就看袂見。10 伊去的時，in向天注目看，忽然有二人穿白衫，倚佇身邊，11 講：「加利利人啊，啥事倚啲看天？此個耶穌離別恁受接接上天，恁看伊按呢上天，伊亦欲照按呢來。」

共同經課 - 2 詩篇四十七篇

1 〔可拉後裔的詩，交互樂官。〕恁眾百姓啊，恁攏著搭手！著用得勝的聲大聲謳嘍上帝！2 因為耶和華至高者，通驚者；伊是大君王管理全地。3 伊欲互萬百姓降服佇阮的下面，亦欲互列邦佇阮的腳下。4 伊給阮揀阮的產業，就是伊所疼的雅各的榮光。（細拉）5 上帝上去，有喝的聲隨伊；耶和華上去，有號頭的聲隨伊。6 恁著唱歌謳嘍上帝，著唱歌謳嘍！唱歌謳嘍咱的王，著唱歌謳嘍！7 因為上帝是全地的王；著用智慧唱歌謳嘍伊。8 上帝做王治理萬國；上帝坐佇伊聖的寶座。9 列邦的貴族聚集欲做亞伯拉罕的上帝的百姓。因為世界的盾牌是屬佇上帝；伊是極高！

共同經課 - 3 以弗所書一章十五節~二十三節

15 因為按呢，我既然聽見恁中間佇主耶穌的信，及顯出佇眾聖徒的仁愛，16 就為著恁感謝無息。祈禱的時數念恁，17 求咱的主耶穌基督的上帝，榮光的父，賞賜恁智慧啓示的神，來深識上帝，18 恁的心目得著光明，互恁知伊召人所向望的是怎樣，伊的業佇聖徒中榮光的富有到怎樣；19 閣知伊的權能向佇咱諸個信的人大到怎樣，20 照伊前所曾行佇基督大權能大氣力的功用，互伊對死人中復活，佇天裡坐伊的大旁，21 搬(pōaⁿ)過攏總辦政事的、掌權的、才能的、治理的，及一切所號的名；毋若佇今世也佇來世，攏搬(pōaⁿ)過遠遠。22 閣互萬項有降服佇伊的腳下，閣將伊做管萬有的頭來賞賜教會。23 教會是伊的身軀，伊所充滿的，伊也是用萬有充滿萬有的。

共同經課 - 4 路加福音二十四章四十四節~五十三節

44 閣對in講：「諸個就是我猶久及恁佇啲的時所對恁講的話：講見若佇摩西的律法，及許個先知，以及詩篇，所記載指我的話攏的確著應驗。」45 就開in的心竅，互in會曉悟許個聖經，46 閣給in講：「有按呢記載，基督著受苦，第三日對死人中復活，47 也反悔及赦罪的道理，欲佇伊的名來傳到萬邦，是對耶路撒冷起。48 恁做諸個代誌的干證。49 也我欲差我的父所應允的到佇恁，總是恁著惦佇此個城，聽候對頂面落來的權能親像衫給恁穿。」50 就導in出去到伯大尼的對面，抬起手給in祝福。51 祝福的時，就離別in，受接接上天。52 in就拜伊，就倒轉去耶路撒冷，大大歡喜，53 常常佇殿內謳嘍上帝。